

Git mke'a Santiaw

*Le'a git mke'a Santiaw nluu le'a tal dub men nge' ladna
Cristo le'a xa xa'aga ndun. Le'a be ta ndun bexa uluu naga nge'
ladna bexa Cristo nate na'an. Le'a ndo' libr ndee nke'a be ta
ndee: be ta juert itid bexa nak xmen Cristo; no ta na isensa'ab
bexa luzh bexa; no utsin gun bexa ndo' be ltsa'a bexa.*

Santiaw mke'a dub git

1 ¹Le'a na' ndee Santiaw, ndun na' ti'in ndo' Dios no ndo'
Jesucristo Xa Nibe'e. Nke'a na' git ndee ndo' bego, bexa
nak isatibtop xkwa'a be xin Israel mte'achso ndo' gizhliyo.

Dios nlu'u ta na lá nyakbe'ena be men

²Bego nak beuna xmen Cristo, uzhe'eb bten ladna bega
zha na nsatid bega isando' be gealkwea', ³le'a bego uni'fka
le'a gor na nxik bega ndo' dub ta juert nyo'o bega, le'a ta wa
ndakno mas doubtsa nge' ladna bega Dios. ⁴Bin bega juers uxik
bega ndo' be gealkwea', ndontsa gak bega lak nsabndo'-yá, no
isu'u bega gak bega lak nlad Dios.

⁵Le'a tal ncho bega lá nyakbe'ena xta'an gun bega, unab bega-yá
ndo' Dios, le'a Dios slu'uka ta wa. Le'a xa uzhebpa ndakno itea be
men, na'anpa gakloo xa tal le'a bega inab ta wa. ⁶Bingea ladna
bega le'a Dios sa'aka ta inab bega wa. Le'a gor na nab bega dub ta'a
ndo' Dios, tal le'a bega igan ladna, le'a bega nak cuent dub golp ten
nitsdo'o ndo'o mbi itea lad. ⁷Le'a xa li nak wa lá gal uso' ta unab xa
ndo' Dios, ⁸le'a xa na li top ndanbe'e wa uzhebpa nzhe'a ta ndun na.

Bexa rik nsea bexa uban nak

⁹Le'a dub xmen Dios, dub xa uban nak, nsabndo' iten ladna
xa, le'a cuent ten Dios le'a xa nsakka. ¹⁰No liga le'a bexa rik

nsabndo' iten ladna le'a be ta ndap xa na'anpa nsak ndo' Dios. Le'a gal gor le'a be ta wa initndo' lak be gé'e ten be gix. ¹¹ Le'a gor nlen wizh gor utii, le'a gix wa sgo'ol ndo' bea, cha ilate be gé'e ten-a, cha li initndo' ta chul nlu'u-yá. No liga snitndo' bexa rik no itea be ta ndap bexa.

Bexa uxik ndo' be ta juert

¹² Uzhebpa wen yoo ladna bexa na uxik ndo' be ta juert itid xa. Le'a zha na mxik bexa ndo' ta wa, le'a Dios usa'a gealnaban ndo' xa, lak ndab Dios usa'a Dios ndo' be men ndankea xa. ¹³ Le'a gor na ndanbe'e dub men gun xa dub ta ugap, lá gab xa ti le'a Dios le'a nki'il xa li gun xa. Le'a na'an ton yoo gan uki'il Dios gun Dios dub ta ugap, no ni Dios na'anpa nki'il men. ¹⁴ Le'a tal ton gunbe'e gun xa dub ta ugap, le'a ta wa le'aka ta ugap ncho len lado'o xa nki'il xa. ¹⁵ We'e le'a ke ten ta na li nlad xa gun xa ta ugap wa, le'a gal gor gunka xa ta wa. Cha gal gor ikesea xa ndo' ta ugap wa, le'a ta wa gun gan gak perdid xa ndo' Dios.

¹⁶ Bego amig ten na!, lá gunbe'e bego dub ta lid le'a nak.

¹⁷ Le'a itea be ta wen no be ta utsin nak, le'a ta wa ta nsa'a Tad Dios, xa mbinde'e be xe'a ndi'ib gibe'a ba', be ta nzhe'a lak nluu-yá. Parea le'a Dios na'anpa nzhe'a lak nak xa. ¹⁸ Le'a lak nlad Dios le'a Dios msa'a di'izh gealngea ten na, ta nsa'a dub gealnaban kub, ndontsa gak beuna ta mas nsak lat itea be ta'a mbinde'e Dios.

Bexa nxobgek ndo' di'izh ten Dios

¹⁹ Bego nak beuna xmen Cristo, le'a bego nsabndo' utsin isakyo'ón ta ndab stub men. Na'anpa cha uxax itaka'ab bega, no na'anpa cha gakloo bega. ²⁰ Le'a be men ugili' wa lá yoo gan gun ta isak ladna Dios. ²¹ Ta we'e bla'a bega itea be ta lá utsin nak no itea ndo' be ta ugap. Ndi utsin gok bega, bxobgek bega ndo' di'izh ten Dios, ta na yá mbingea ladna bega. Le'a di'izh wa su'u ko'o beuna ndo' be ke ten beuna.

²² Gok bega lak ndab di'izh ten Dios, na'anpa sbe'en go'óntsa bega-yá. Tal le'a bega sbe'en go'óntsa-yá, cha lá gak bega lak ndab di'izh wa, le'a bega ukwi'inno le'aka le'a na. ²³ Le'a tal ton sbe'en ndo'óntsa di'izh ten Dios, ná lá gun xa lak ndab-a, le'a xa wa cuent nak dub men mwi'i xte'e nak ndo' na ndo' wa'lán.

24 Mwi'i xa le'aka ndo' xa cha ncha'a xa, cha uxax myalad xa xte'e nak xa. **25** Ná le'a tal ton isakyo'ón ta ndab di'lizh ten Dios, no gun xa lak ndab-a idub tiemp, no na'anpa yalad xa-yá, le'a xa wa uzhebpa wen yoo ladna ndo' itea be ta ndun xa. Le'a di'lizh ten Dios uzhe'eb wen nak, na'an xta'an ndun jwalt-a, no sun-a gan ko'o-yá beuna ndo' be ke ten beuna.

26 Tal ncho dub xa lat bega, nsak xa uzhe'eb wen ndun xa ta nlad Dios, ná lá ndaisa'ab xa ndo' be di'lizh ugap ndadi'izh xa, le'a xa wa nkwi'inno le'aka le'a xa. Le'a ta li nsak xa wen ndun xa wa ta na'an xtil'in. **27** Le'a Tad Dios ndab le'a tal ton nlad gun ta isak ladna Dios, nsabndo' gakno xa be me'ed usa'ab no be xagots nab ngut xabgil'i ten na ndo' be ta juert ncho xa. No na'anpa gun xa be ta ugap nak, lak be ta ndun bexa lá nchando' Dios.

Be xmen Cristo lá nsabndo' uti men

2 **1**Bego nak beuna xmen Cristo, bexa nge' ladna Jesucristo xa ndon le'a nibel'e ten beuna, le'a bega lá nsabndo' uti men. **2** Le'a lak sa nyakjunt bega ntsid bega, tal ilansea' dub men ncho sian ganil oro ya'a xa no nak xa be lad uyap, no tal dub xa nak lad myox uban nak xa noga ilansea' sa wa, ¿xte'e gun bega zha? **3** Le'a tal bega mas utsin gak ndo' xa nak lad uyap wa no gab bega ndo' xa: "Utsea go isob ga ndo' yaxil ndee", ná le'a ndo' xa uban nak wa cha gab bega: "Ba'atsa uso' natal usob ndo' yo ba'?" **4** ¿Lá ini'í bega zha le'a tal bega li ndun le'a bega nti men no ndanbe'e bega ta ugap?

5 Bego amig ten na', bla'ach bega ta gáp na' ndee: ¿Lá ini'í bega zha le'a Dios le'a mti bexa uban nak ndo' gizhliyo ndee, yak bexa xa rik ndo' Dios ta na nge' ladna bexa Cristo? No usa'a Dios sa yoo bexa wats Dios, lakka ndab Dios usa'a Dios ndo' bexa ndankeea xa. **6** Ná le'a bego na'anpa utsin li ndanno bexa uban nak wa. ¿Lá ini'í bega zha le'a bexa rik wa mas ugap ndanno bega zha? No ndo'o juers xa bega ndo' bexa naktil'in. **7** No uzhe'eb kwea' ní'i bexa ndo' Jesucristo xa nak Xwan beuna.

8 Uzhe'eb utsin ndun bega tal nxobgekka bega ndo' ley ten Dios, lak nkeani'i di'lizh ten Dios, ndab-a: "Bkwea' ladna lu be Itsa'a lu lakkata lu."^a **9** Ná tal le'a bega nti men, le'a bega ndap

^a **2:8** Lv. 19:18

ke ndo' Dios, le'a bega na'anpa nxobgek ndo' ley wa. ¹⁰ Le'a tal ton ndun itea be ta nibe'e Dios, ná lá nxobgek xa ndo' stubtsa ta'a nibe'e Dios, le'a xa wa ndap ke ndo' Dios cuentka dub men ni dub ta'a lá nxobgek ndo' Dios. ¹¹ Le'a Dios ndab: "Lá ugal bega stub xa na'anpa xa ten bega." No ndab Dios: "Lá gut bega men."^b Ta we'e tal le'a bega na'anpa ngal stub men, parea ndut bega men, le'a bega ndapka ke ndo' ley ten Dios.

¹² Ta we'e utsin bidi'izh bega no utsin bin bega, le'a gal dub wizh le'a Dios gab naga mxobgek beuna ndo' di'izh ten Cristo, ta ngo'o beuna ndo' be ke ten beuna. ¹³ Le'a tal ton lá nkwea' ladna be Its'a' na, le'a gal wizh wa le'a Dios liga na'anpa ikwea' ladna xa wa. Ná le'a bexa nkwea' ladna be Its'a' na, le'a gal gor ilansea' xa ndo' Dios le'a xa wa wen ya'an.

Bexa nge' ladna Dios no bexa ndun ta nsak ladna Dios

¹⁴ Bego nak beuna xmen Cristo, ¿xti'in ta ndab dub men nge' ladna xa Dios, tal le'a xa lá ndun ta nsak ladna Dios zha? ¿Xte'ema syo'o gan gap xa gealnaban ndo' Dios zha? ¹⁵ No tal ncho dub xmen Jesús, cha lá ndap xa sian xab xa no ni lá ndap xa ta gaw xa, ¹⁶ cha gab bega ndo' xa: "Byo' wen ladna lu, no ubix xab lu no wen udaw", le'a ta li ndab bego ndo' xa wa na'an xti'in, tal le'a bego lá usa'a ta nki'in xa. ¹⁷ No liga tal ton ndab nge' ladna Dios, ná lá ndun xa ta nsak ladna Dios, le'a ta ndab xa wa na'an xti'in.

¹⁸ Ná le'a ncho bego gab ndo' na! "le'a ncho bexa nge' ladna Dios, no nchoga bexa ndun be ta nsak ladna Dios." Le'a na' gáp ndo' bego bluu bega ná xte'e nge' ladna bega Dios sin lá gun bego dub ta nsak ladna xa. We'e le'a na' uluu be ta wen ndun na', ta nluu le'a na' nge'ka ladna xa. ¹⁹ Le'aka nak ta ndangea ladna bega le'a Dios dubtsa, parea le'a gast be mbi bixin no ndangea ladna ta wa, no nxis mbi bixin wa nzheb ta wa ndo' Dios. ²⁰ Lá gak bega dub xa tont. ¿Ni lá nyakbe'ena bega zha le'a ta na nge' ladna bega Dios wa na'an xti'in, tal le'a bega lá ndun ta nsak ladna xa?

²¹ ¿Lá ini'í bega zha le'a Abraham usan gox polta ten beuna wa mbin ta nsak ladna Dios, zha na ndi'izh ngut xa Isaac xme'ed xa cuent dub xnab ndo' Dios? ²² ¿No lá nyakbe'ena

^b 2:11 Ex. 20:13; Dt. 5:17

bega zha le'a Abraham mge' ladna Dios no mbin xa ta msak ladna Dios? Le'a ta na li mbin xa ta nlad Dios, ta we'e mluu le'a xa mge' ladna Dios. ²³Le'a ta wa lak nkeani'i di'izh ten Dios, ndab-a: "Le'a Abraham mge' ladna Dios, ta we'e myak Abraham dub xa wen nak ndo' Dios."^c Cha li myak Abraham amig ten Dios.

²⁴Le'a ta ndee nluu le'a beuna wen ya'an ndo' Dios ta na ndun beuna ta nsak ladna xa, na'anpa nabtsa ta na nge' ladna beuna xa. ²⁵Le'a ta wa lak mbin Rahab dub xagots mbin juis mgi'i. Ngol dub wizh le'a xa mbin dub ta nsak ladna Dios, mkachko xa bexa ngwa'bewi'i gezh Jericó no msanes xa bexa wa stubga nes ya'be bexa. Ta we'e wen mya'an xa ndo' Dios. ²⁶Le'a lak dub men yá ngut wa na'an xti'in, no ligia le'a tal ton dub xa gab nge' ladna Cristo, ná lá ndun xa ta nsak ladna Dios, le'a ta na li ndab xa nge' ladna xa Cristo wa cuent nak dub ta ngut, dub ta na'an xti'in.

Nsabndo' isensa'ab be men luzh na

3 ¹Bego nak beuna xmen Cristo, na'anpa kwa'ad bega ukwa'an xte'e gak bega mech nluu di'izh ten Dios. Le'a bego uni'íka le'a tal ton na'anpa utsin nluu di'izh ten Dios, le'a xa wa mas ndap ke ndo' Dios. ²Le'a iteanak beuna nchonian biaj ndun beuna ta ugap. Ná tal dub xa nxik na'anpa cha kwea' ní'i xa ndo' dub men, le'a xa we'e ga'al nso' ndo' Dios, le'a xa wa sun gan isensa'ab xa xa ndo' itea be ta ugap.

³Uni'í bego le'a beuna ngo fren to'o dub way natsa gun ma ta nlad beuna, go'o beuna idub ma guni'i pa nlad beuna. ⁴No binbe'e bega ná xte'e nak dub barco nsea ndo' nitsdo'o. Le'a ta wa dub ta si'il, no uzhe'eb dub mbi juert nsi'i-yá, parea le'a dub ble'a ya tuzhtsa ntse'a bexa-yá guni'i pa nlad xa. ⁵No ligia nak luzh men. Mas dub ta tuzhtsa-yá, parea le'a-yá syo'o gan gun sian be ta uzhe'eb, lak dub gi' tuzhtsa stso'ol idub ge'e si'il.

⁶Le'a luzh dub men ndun sian ta ugap, cuent dub gi' ndazha'a sian be ta'a. Le'a be ta ugap ndadi'izh dub men utsabgix idub xa, ndazha'a-yá idub gealnaban ten xa, cuent dub beal' nto'o infierno.

^c 2:23 Gn. 15:6

⁷Le'a be men ndun gan ndo' itea ndo' be man ndap dap xo'o na, no be man nsa'ab, no be mbe'al, no itea be man ncho len nits. ⁸Ná le'a ni dub men lá gun gan isensa'ab lugh na, le'a-yá uzhe'eb dub ta ugap nak, cuent dub venen ugí'i ndut men.

⁹Le'a lugh beuna le'a ndab beuna ta juert nak Dios Xus beuna. Ná le'aga-yá nisi beuna be Itsa'a beuna, bexa le'aka Dios mbinde'e lak nak Dios. ¹⁰Le'aka to'o be men nto'o be dil'izh utsin no dil'izh kwea!. Bego nak beuna xmen Cristo, lá nsabndo' li gun beuna ta wa. ¹¹¿Ti ncho pa uni'í bega nsoblen nits wen no nits ula' dub se'etsa? ¹²¿Na ti ncho pa uni'í bega le'a ya la'aw nsa'a ngus olivo natal dub ya uv nsa'a ngus la'aw? No liga le'a dub sa nsoblen nits lá yoo gan ilen nits utix no nits wen.

Xa na ta ugeaka ndák

¹³¿Ton bega nsak le'a mas ndák no nyakbe'ena xte'e nak Dios zha? Le'a bego wa nsabndo' gun sbe'en be ta wen no bcha'an gak bega, ta uluu le'a bega ndákka. ¹⁴Ná le'a tal ton ixee ladna ndo' be Itsa'a na ta na ndap xa ta'a, no nlad xa sbe'en le'atsa xa gun gan, lá nsabndo' gab xa le'a xa mas ndák. Le'a ta wa gealkwi'in, le'a xa wa na'anpa ta ugea ndák. ¹⁵Le'a ta ndák xa wa na'anpa ta nsa'a Dios, le'a ta wa ndi ta gizhliyo lak ndanbe'etsa be men, no ta nsa'a maxu'u-yá. ¹⁶Le'a sa na ncho bexa nxeneo ladna be Itsa'a na, no nlad bexa sbe'en le'atsa xa gun gan, le'a sa wa sbe'en ndeyo bexa no ndun bexa itea ndo' be ta ugap.

¹⁷Ná le'a bexa ndák lak nsa'a Dios, le'a xa wa umbi'i nak lado'o na ndo' Dios: bcha'an nak xa, no utsin nak xa ndo' be Itsa'a xa, no na'anpa kwea' nak xa ndo' be men, no uzhe'eb nlats ladna xa be men, no itea ta'a ndun xa wa utsin nak, no lá nti xa men, no idub ncho ladna xa ndun xa ti'in ndo' Dios. ¹⁸Tal le'a bega ukwa'an dub mod lá kuyono bega be Itsa'a bega, le'a ta wa gun gan wen yoo ladna bega, no gun bega ta nsak ladna Dios.

Bexa nkwa'an be ta gizhliyo ndee

4 ¹Binbe'e bega ná pa nsea ta na ndeyo bega, no pa nsea ta nyoto'o bega. Le'a na' gáp le'a len lado'o bega le'a ncho be ta ugap nlad bega gun bega, ta we'e ndeyo bega. ²Le'a

beaga nsa'ab ladna gap bega ta ndap stubga men, ná le'a bega lá ndun gan gap bega ta wa. Ta we'e ncho bega ndut men, no ndaklono bega bexa ndap ta'a, no nylo bega. Ná le'a bega lá ndapka be ta nlad bega wa, geal le'a bega lá inab-a ndo' Dios. ³Ná tal inab bega dub ta'a ndo' Dios, le'a xa na'anpa usa'a-yá, geal le'a bega nab dub ta lá nsabndo', dub ta gunti'in bega laktsa nlad bega.

⁴¡Bego ba' na'anpa nab Dios ndankea! ¿Lá ini'í bega zha le'a tal ton ukwa'an be ta ugap ncho ndo' gizhliyo ndee, le'a xa wa yak dub xa nyono Dios? Ta we'e tal le'a bega nkwa'an be ta gizhliyo ndee, le'a bega nak xa nyono Dios. ⁵¿Nsak bega zha na'an xti'in be dí'izh ten Dios? Ndab-a le'a Dios ulo Espíritu ten na len lado'o beuna, uzhebpa nlad Espíritu wa Diostsa yankea beuna. ⁶Ta ugeaka le'a Dios uzhebpa ndakno beuna, lak ndab dí'izh ten Dios:

Le'a Dios lá ndakno bexa zhin nak,
le'a xa ndi ndakno bexa bcha'an nak.^d

⁷Ta we'e bxobgek bega ndo' Dios. Lá ula'a bega gak ta nlad maxu'u, we'e le'a maxu'u sxo'onka wats bega. ⁸Ubii bega wats Dios, le'a Dios ibiiga wats bega. Bego na ndun ta ugap, bla'a bega be ta ugap wa. Bego na nlad yankea Dios no bi nlad bega gun bega ta ugap, btsambi'i bega len lado'o bega, cha ndi bkwa'an bega Dios. ⁹Kwea' byo' ladna bega, no uban byo' ladna bega, no bi'in bega. Yá lá uxi'dta bega, ndi bi'in bega. No na'anpa iten ladna bega, ndi uban byo' ladna bega. ¹⁰Byak byux bega ndo' Dios Xa Nibe'e, we'e le'a xa gunno bega dub xa nsak cuent ten Dios.

Bexa nisi be Itsa'a na

¹¹Bego nak beuna xmen Cristo, lá inisi bega be Itsa'a bega. Tal ton inisi Itsa'a na, no gab xa le'a Itsa'a xa lid le'a ndun, le'a ta wa cuent nisi xa ley ten Dios, no ndab xa le'a ley wa lid le'a nak. Mas wen uxobgek bega ndo' ley ten Dios, cha na'anpa gab bega le'a-yá lid le'a nak. ¹²Ndon Diostsa nak xa msa'a ley wa, no ndon nabtsa Dios syo'o gan gab tal dub men ya' wats

^d 4:6 Pr. 3:34

Dios natal ya' xa infierno. Parea bego zha, ¿ton nak bego gab bego le'a Itsa'a bega lid le'a ndun?

Bexa zhin ndadi'izh ta guntsa bexa

¹³Bla'ach bego nat, bego lnde'e ndab: "Wizh nat natal ge'a ncha'a besa stub gezh. Le'a sa wa yoo besa dub li'in, gun besa ti'in, no gun besa gan sian med." ¹⁴Parea le'a bego ni lá ini'lí xta'an yoo ge'a. Le'a gealnaban ten bega cuent nak mbe nla'ndo' yo dub xla'altsa, cha uxax nitndo'-yá. ¹⁵Ndi nsabndo' gab bega: "Tal le'a Dios nlad, we'e gun besa ta ndee natal stubga ta'a." ¹⁶Ná nat le'a bego ndi nzhinnona be ta gun bega. Le'a itea be ta li nzhinna be men wa, le'a ta wa ta lá nsak ladna Dios. ¹⁷Le'a tal ton nchando' xta'an dub ta wen gun xa, ná cha lá gun xa ta wa, le'a ta wa dub ke ndo' Dios.

Dios utsaksi bexa rik bexa ugap ndun

5 ¹;Le'a bego xa rik, bla'ach bego ta gáp na' ndee! Utezhat bega bi'in bega, le'a bega ini'lí sian gealkwea!. ²Le'a be ta sian ndap bega wa ta ndazha'a, no be xab bega nsayak gu'ud, ndaw mbes-a. ³No le'a ta oro nsea ta plata ten bega wa sach mbe. Le'a gal dub wizh le'a mbe wa uluu le'a bega ugap mbin, cha yol' bega ndo' gi!. Sian be ta'a ndegocha'aw bega, ná nat be wizh lult. ⁴Le'a be men ndun ti'in ge'e ten bega wa nsake ndo' Dios ta na lá nkix bega med ten bexa. Le'a Dios xa ndon le'a juert nak ndo'ón ta ndab bexa li ndun ti'in wa. ⁵Le'a bego xa rik ba' ndun itea be ta nlad na, be ta ncho ndo' gizhliyo ndee, no ndap bega itea be ta ndal ladna bega. Le'a bega nak cuent dub man nya'al ni lá ini'lí ma ti gal wizh gat ma. ⁶Le'a bego nkwi'lín nsake bega be men utsin ndun, ndab bega gat bexa. Ná le'a bexa wa lá yoo gan utsakndo'!

Be xmen Jesús ndenkea' zha ilen Jesús

⁷Bego nak beuna xmen Cristo, lá gach ladna bega uxik bega gast zha ilen Jesús Xwan beuna. Binbe'e bega xte'e nak dub xa ndun ti'in ge'e, xte'e ni lá ndach ladna xa nkenkea' xa gast zha nla' gi ned, nsea gast zha myats gi ntele'e xa be ta nsa'a-yá. ⁸No liga bego ba' dubtsa ute bega lá gach ladna bega, le'a Jesús Xwan beuna sken ilen. ⁹Bego nak beuna xmen Cristo, lá iní'i kwea' bega ndo' be Itsa'a bega, cha na'anpa gab

Dios le'a bega ndap ke. Bla'ach bega le'a Dios yamer gi'id ina' ná xte'e gak ta ndun be men.

10 Bega nak beuna xmen Cristo, bin bega lak mbin bexa mbidi'izh sakndo' Dios tiemp polta. Le'a bexa wa sian gealkwea' uni'í, ná nunk bexa lá ngach ladna. **11** Le'a beuna uni'í le'a bexa na nxik ndo' be gealkwea' wa wen yoo ladna. Ndo'ónla bega lak mxik Job ndo' be gealkwea' uni'í xa. Cha ngol zha le'a Dios mbin uzhe'eb wen mya'an xa, le'a Dios uzhe'eb dub xa nlats ladna beuna no nkwea' ladna xa beuna.

12 Ná le'a bego nak beuna xmen Cristo, le'a ta gáp na' ndee ta mas nsabndo': le'a gor ndadi'izh bega gun bega dub ta'a, lá use'at bega gibe'a ni gizhliyo no ni stubga ta'a. Tal le'a bega gun dub ta'a, litsa gud bega. Ná tal le'a bega lá gun ta wa, na'antsa gud bega. Sbe'en gealngea bidi'izh bega ndontsa na'anpa utsaksi Dios bega.

Dios sa'aka ta inab bexa nxobgek ndo' Dios

13 Tal ncho bega kwea' ncho ladna, bidi'izhno bega Dios. No tal ncho bega nten ladna, bilt'o bega ndo' Dios. **14** No tal ncho bega kwea' nsak, utezh bega bexa nchansu be xmen Cristo, ka'ab bexa aceit gek bego gizh wa, no inab bexa ndo' Cristo yakna bega. **15** Tal le'a bexa idub ncho ladna ige' ladna Dios gor na li nab xa ndo' Dios, le'a Dios syunyakkana bega yaste bega. No tal le'a bega ndap ke ndo' Dios, le'a Dios utsu'uka ke ten bega. **16** Bgondo' bega tal ncho zha ntidnsa'ab bega ndo' be Its'a bega. No unab bega ndo' Dios yunyakna Dios be Its'a bega. Le'a tal ton dub xa ga'al nak ndo' Dios, le'a gor na idub ncho ladna xa inab xa ndo' Dios, le'a Dios so'ónka ta ndab xa wa.

17 Le'a Elí dub profet mbidi'izh sakndo' Dios tiemp polta, dub men lakka le'a beuna. Le'a zha na idub ncho ladna xa unab xa ndo' Dios lá ila'ta gi, cha yá lá ila'kata gi chon li'in itol. **18** We'e cha unabgal xa ndo' Dios ila'gal gi. Le'a gi wa cha ula'kagal, cha ngokgal be ta'a ndo' yo.

19 Bego nak beuna xmen Cristo, tal ncho dub xa uto'o len nes ten Dios, ná le'a stub xa gun gan yach xa wa wats Dios, **20** nlad na' ini'í bega le'a xa na li gun gan yach men wa wats Dios, le'a xa wa ulat gealnaban ten xa wa ndo' gealgut no gun xa gan le'a Dios utsu'u itea be ke ten xa wa.

Las ilustraciones de las páginas 4, 6, 10, 24, 27, 44, 51, 83, 90, 92, 95, 96, 108, 126, 144, 154, 159, 161, 170, 183, 195, 221, 224, 242, 251, 253, 276, 286, 305, 308, 314, 318, 320, 324, 340, 346, 354, 355, 360, 368, 370, 374, 391, 398, 399, 493, 524, 555, 567 y 645 son propiedad de ©1978 David C. Cook Publishing Co., y son usadas con el permiso correspondiente.

Las ilustraciones de las páginas 64, 66, 131, 279, 330, 421, 426, 488, 497, 515, 583 y 585, por Louise Bass, son propiedad de
©The British & Foreign Bible Society, 1994.

Las ilustraciones de las páginas 296 y 641, por Horace Knowles, son propiedad de ©The British & Foreign Bible Society, 1954, 1967, 1972, 1995.

Primera edición
El Nuevo Testamento
Zapoteco de San Vicente Coatlán
zpt 14-105 5C
©2015 Wycliffe Bible Translators, Inc.
Versión electrónica ©Wycliffe Bible Translators, Inc. 2015
www.scriptureearth.org

Usted es libre de: Compartir – copiar, distribuir, ejecutar y comunicar públicamente la obra bajo las condiciones siguientes:

Atribución. Debe reconocer los créditos de la obra de la manera especificada por el autor o el licenciatte (pero no de una manera que sugiera que tiene su apoyo o que apoyan el uso que hace de su obra).
No comercial. No puede utilizar esta obra para fines comerciales.
Sin obras modificadas. No se puede alterar, transformar o generar una obra derivada a partir de esta obra.

<http://creativecommons.org/licenses/by-nc-nd/2.5/mx/>